

仿今言一卷

義門何氏未解古升

義門何氏三國評本土林珍重按焦先扈累寒貧皆嘗官給廩日五升而云食不足此升何其小耶或是月給廩五升然南監板亦正作日字又曲圓其說曰諸葛公啖食不至數升司馬懿知其將死然則古升僅如今之勺合耳義門之說如此攷靈樞經人食一日中五升會稽王道子傳國用虛竭自司徒以下日廩七升杜氏通典言六朝量三升當今一升開皇以古斗三升為一升漢書食貨志食人月一石半史記廉頗傳一飯斗米以此核之則食不足似未為過至若古升僅如今之勺合則又視

蠅術堂

蕭山沈 豫 補堂著

升大小唐六典容一千二百黍為龠二龠為合十合為升宋沈括筆談曰予受詔考鍾律及鑄渾儀求秦漢以來度量計六斗當今之一斗七升九合是古之升斛比之于今大抵三而當一未得云一合而可名為一升也

全唐文雕板緣始

全唐文黃綾本一千卷總目四卷嘉慶十九年頒發兩淮鹽政阿克當阿敕交兩淮敬謹刊校當延就近各紳士熟諳校勘書籍之員錢塘吳錫麒陽湖孫星衍全椒吳嘉欵縣洪梧萍鄉劉鳳誥會稽莫晉儀徵貴徵黃文輝鎮江趙佩湘等為總裁總纂分校監刻收掌等員無數皆豐膳極一時之盛其間統率校售精工完善者淵如倍加謹慎淵如富藏書唐文尤備由白下載書至廣陵而分校各士又博通凡例其板仿照唐宋文醇字式御製序文天章雲漢奎壁騰輝徧刻館臣銜名而兩淮監刻諸臣亦准列于館臣之後陳設本二十四部每部一百套賞賚本一百部用石青杭紬套板片存貯運庫其時兩年有餘而延請紳士及雕板之費無慮一二十萬金一時之勩其事者鴻儒碩彥蓋聯聯接踵云

綠頭籤

吏部選功司帶領引 見先書綠頭籤籍貫科分廕襲援例并
叅罰勞績一一聲敘明白經 御覽後再降諭旨至吏部製籤

始于

明萬曆中孫丕陽為
冢宰見明史選舉志

八旗駐防得本省鄉試

本朝凡有將軍處俱有駐防向無在本省鄉試者自嘉慶丙子科推廣 皇仁凡江浙川廣等省酌設額數得以就近赴試浙江中式三名按陔餘叢致寄籍條元月魯不花本蒙古遜都思氏隨其父任就試江浙鄉闈中右榜第一則元制蒙古人亦可就試各省特隨任與駐防微別耳

京債

明紀事劉瑾弄威福諸司官朝覲至京畏瑾虐焰各斂銀賂之每省至二萬兩往往貸于京師富豪復任之日取官庫貯倍償之名曰京債前朝猶以外省入朝始借重利今則在京候選人員并佐雜丞倅等官每得省分無不設法挪借視路之遠近定利之輕重如雲貴等省得本銀三百而券立一千者其風更不

可問矣

門鈴

京都人家門隙繫長繩一條內綴以鈴凡客屬往來拉鈴主人即啟門鑰暇讀江南餘載陳致堯雍家置大鈴署其旁曰無錢雇僕客至請挽之則設鈴由來久矣

洋錢

閩粵大行次浙江江西江南鎮江以北罕見之市中換錢每個減價一二百不等今漸行於淮徐北省矣漢西域傳罽賓國以金銀為錢文為騎馬幕為人面安息國以銀為錢錢如王面幕如夫人面今洋錢面有倭婆樣亦其遺制也其式有馬劍雙柱等樣重以七錢二分為定偽者有鑽鉛夾銅蘇板廣板噴銀鈎

工四工之類面有戮者減價而福建廣東反以此為通用緣無假故也

錢大昕攻駁顧亭林

顧氏亭林作音學五書錢氏大昕力攻之于毛傳多轉音曰亭林泥於一字祇有一音遂謂詩有無韻之句是不然矣于易韻曰顧氏拘於偏旁謂一字不當有兩音故於此等未能了了絳縣人七十三年下曰顧亭林謂古人以歲盡之日而後增年亦無他據徒兵下唐石經徒卒作徒兵顧氏金石文字記以為石刻之誤種種論說殊有未安

巡檢本大官

北齊書司馬子如為北道行臺巡檢諸州守令以下委其黯陸

番子手

京都九門提督衙門有番子手凡積匪猾賊見之一無漏網以其矯便而捷健也匡謬正俗卷八番或問曰今之宿衛人及于官曹上直皆呼為番音翻于義何取答曰按陳思王表云宿衛之人番休遞上此言以番次而歸休以番次而遞上昔則為官今則為役尚有古之遺意

禿頭州

禿頭州即今之直隸州按 欽定歷代職官表直隸州之職畧如知府每於州縣中記名特簡考唐渤海國鄆銅涑三州為獨奏州不隸於府蓋直隸即獨奏禿頭又獨奏聲之誤

四榜

全椒吳學士山尊名鼎曠代逸才通籍後乞假養親僑寓廣陵之大虹園春花秋月觴咏其中後堂絲竹華綉綺艷比之馬扶風筆牀銀管自標其名山尊著書之筆山尊作畫之筆嘗誇于衆曰人之科第不過兩榜我獨有四榜蓋先舉拔萃科又中乾隆丙午科副車再後鄉會獲雋耳

名帖用小片

撫言卷九芳林十哲列聖忌辰宰執以下於慈恩寺行香忽有彩帖子千餘各方寸許隨風散漫有若蜂蝶其上題曰新及第進士郭薰迄今市井販夫皆用之

廩保

今時舉童子試縣試府試院試三試點名策上皆書廩保名并畫押在名策下如有匿喪代倩頂替等弊與考者一律懲治保有挨保有認保挨保者如保人位置在第一則第一名該首保者保之以下逐名輪次周而復始此言士子進身之始如此精詳及觀唐撫言卷一述進士下篇將試各相保謂之合保則保由來已久矣按合保即今之互童

三十而立

按以下每進境率十年獨立必俟至十五年者何故蓋立之一節學者之大關鍵故曰可與適道未可與立儒行曰其特立有如此者冉求之聚斂子貢之貨殖文若之失節於曹瞞伯喈之發跡於董卓推之鄭孔之解經程朱之入道多在中晚才能訂正確鑿不入魔障即大聖人之生知天縱腳根亦未易牢固矣

南都賦

篠簞箠筆注箠筆其形未詳戴凱之竹譜箠築生於漢陽時獻以為輅馬策

則有蓼藪藁荷廣韻藪菜名葉似蕎麥生濕地又會稽志越王採藪藪山

藪蔗薑播檀弓草木之滋薑桂之謂也播正字通播似蒜名百合蒜亦名蒜齒非蒜也

蜀都賦

兼六台而交會焉周禮地官天地之所交焉風雨之所會焉陽藪陰敷此句總括其圃以下注云陰敷薑生於陰恐未必然

勒宜軒公中堂保

勒宜軒公由川督入相未幾目盲請開缺 上眷愛特深賜如意曰賜卿如意從此必定如意予讀北齊書至祖珽傳盲人掌機密來全不共我輩語止恐悞他國家事噓目盲矣猶欲把持朝政以視公之恬退何如耶

文字起結書年月時日

今士大夫作碑板金石敘年月歲時多直用日辰之名揆諸雅訓迥異爾雅十太歲在甲曰闕逢在乙曰旃蒙在丙曰柔兆在丁曰強圉在戊曰著雍在己曰屠維在庚曰上章在辛曰重光在壬曰平默在癸曰昭陽十二太歲在寅曰攝提格在卯曰單闕在辰曰執徐在巳曰大荒落在午曰敦牂在未曰協洽在申日涿灘在酉日作噩在戌日闍茂在亥日大淵獻在子曰困敦

在丑日赤奮若爾雅正義賈誼鵬賦云單過之歲郊祀樂歌云
天馬來執徐時說文敘云困敦之年韓勅造孔廟禮器碑云歲
在涇灘吳志陽羨山圉碑於是旃蒙協洽之歲月次陔訾之舍
日惟重光大淵獻行年所值實惟茲歲呂氏春秋云惟秦八年
歲在涇灘北周滕王宇文迪撰庾子山集序至今歲在屠維龍
居淵獻觀此數條則漢魏六朝大半用雅訓居多然亦有不盡
然者西嶽華山亭碑云歲在戊午荊州刺史度尚碑云歲在鶉
尾龍集丁未金鄉長侯成碑云歲在巳酉歲在甲辰以甲子紀
歲趨從簡易非一日矣

貓食鼠頭身尾依上中下三旬為次

余前年由船北上舟中鼠極盛畜一貓望日貓搏一鼠留頭尾
而食其身下月朔日又得一鼠嚙其頸而身尾完全物類之口
舌亦上應乎氣候耶以朱子九條格物之說細細摩揣之是必
有道矣

押韻用姓

嘉慶甲戌春廣陵都轉廖公祖錢公車北上分韻各以己姓讀
老學菴筆記九卷韓子蒼答和錢遜叔詩云叩門忽送銅山句
知是賦詩人姓錢蓋唐詩人錢起賦詩以姓為韻

何晏論語集解

臧茂才經義雜記論語古今文條魏吏部尚書何晏集孔安國
包咸周氏馬融鄭康成陳羣王肅周生烈并下巳意為集解又
云何晏所集七家內孔安國馬融蓋純乎古文餘則三家並有

然鄭君從古論有注以識別使後人可考何晏就三家本以意為之自序稱集諸家之美有不安者頗為改易故採孔馬之注則改包周之本用包周之說又易孔馬之經自成一家不今不古深可慨也

維揚

揚州稱維揚本禹貢淮海惟揚州而惟之改維不知何時始及讀王禹偁小畜集揚州寒食贈屯田張員外詩有維揚非所愛句則維揚之稱自宋已然矣

朝考去疏

向來新進士朝考以論詔疏詩四項命題嘉慶丁丑科奉 上諭士子文藝試以論疏詩三項優劣已可概見嗣後新進士朝考着裁去一道以論疏詩三項命題着為令又殿試策未向係係草茅新進云云結尾惟是宗室人員得邀選入草茅一字似為未妥 上諭改為末學二字亦壬戌科起也

兩淮鹽政

鹽政係 欽差一年扣期報滿留至三差是非常特恩今厚莽阿克當阿留十餘任此皆曠古所未有其在揚一以禮賢好士為務整飭安定梅花兩書院額增膏火逢二八每親到按簿點名更建孝廉堂培養人才如洪殿撰瑩戴殿撰蘭芬皆出自門下給發公車費寒俊多被惠焉

毘陵王仲則

仲則與孫淵如洪稚存齊名為七子之一少有雋才聘入畢秋帆中丞幕中偶思家賦七絕末二句云全家俱在秋風裏九月

寒衣未剪裁為畢公所見即為寄朱提五百而仲則未之知也
益愛才若命者矣

五賢祠緣起

衡山聶蓉峯先生于道光八年春攝紹興太守整肅文教修廢
起衰甚有循聲吾鄉素為澤國自漢馬太守諱臻明湯公紹恩

戴公琥彭公誼建設閘壩宣洩得宜民生免吾魚之苦而劉公

宗周

于明季時更為相度地勢築一閘座雖淫雨連綿江流陡

漲亦無大害是馬湯諸公善作于前而劉公善成于後其有裨
于吾越者甚大惟馬湯向有賢祠彭戴亦載入誌乘而劉公闕
如茲特于府署西南彙建一祠中座馬東邊彭戴西邊湯劉繪
像森嚴主中塗朱外稜飾金尺寸亦不逾古制祠下東路邊樹

一碑隸書五賢大略并水利源委亦有所據云

潮水關文運

予幼時固陵關外沙岸甚遠有頭廟二廟三廟三廟去江不遠
彼時自西至東吾蕭止有兩主政一長河來起峻先生一吾家
沈文炳先生南北兩路絕少科第自後江流日漸蕩漾西風激
激浸浸抵壩遙睇吳山縹緲幻儻其自大興朱相國文正公出
隸外籍者無算如平泉陸大司空敦甫湯太宰南陔王中丞子
臯瞿太守觀察徐古梅中丞何寅士監察盛蘆汀姚慶元編修
高樸園何南曦庶常王福將中翰傅篁山此皆以功名政績著
而文章經術則穀騰王進士銓部汪蘇潭中書陳待軒夫子尤
為羣彥共推祭酒五十年來後先接踵至公車北上盛時得六

十餘人本年^{壬辰}鳳標朱公臚傳第二尤為傑出諺云山朝不如水朝每當秋潮肆浪滾雪飛花沿塘廬舍撼震搖動縱目洪濤亦足豁幽滯增興致也

蒙古善傷科

茶餘客話云張涇南司寇照墜馬傷右臂幾折時方進呈落葉倡和詩遂用左手書楷凝厚蘊藉無一筆呆滯真造化手也時得蒙古良醫百日全愈天台齊宗伯暮出禁門馬逸不止顛焉腦髓竟出賴蒙古某治之兩月餘始活

義門何先生

義門學士績學好古于經史研討甚力而各有發揮今坊間所刻讀書記亦其大略也獨當日有不准授庶吉士再教習三年

之 旨其惟庶常吉士真清貴也

止齋孟先生

止齋名煜錢塘籍僑寓山陰之江墅優于貢書法學大令先君嘗親炙之著有十三經予與先生曾孫克任有葭莩親晤于京門之東河沿出春秋全帙示予曰此先曾手筆也集端天台齊宗伯為之序緘貯甚固予亦附一小敘未幾克任没于都而此集不知散佚何處上年冬杏史館江村懋鴻施丈家謂予曰此中有老宿著述甚富詢之卽止齋先生也遂向伊孫借而讀之翻閱查對止缺春秋惜通德之後未得小同而門下士又不能如李漢之集昌黎亦大可悼也

西河毛先生

自古著述之富漢則鄭康成宋則鄭夾漈其最著也西河全集
幾欲與之等獨是任情馳意旁若無人頗不諧于羣彥淮陰阮
樾軒先生嘗戒子弟曰近見後生小子皆喜讀毛西河集其所
稱引未足為據必須搜討源頭字字質證慎勿為懸河之口所
謾因言西河與閻百詩辨地理多穿鑿百詩太息曰汪堯峰私
造典禮李天生杜撰故實毛大可割裂經文貽悞後學非淺又
亭林先生答鈍翁書曰學究天人確乎不拔吾不如王寅旭獨
精三禮卓然經師吾不如張稷若博聞強記羣書之府吾不如
吳任臣文章爾雅宅心和厚吾不如朱錫鬯歷數諸宿而大可
特未之及想不無愾而悻乎

蕭邑藏書之富

昔徐健菴作葉石君傳云江浙藏書家有金陵焦氏四明范氏
錢氏半野之藏甚富惜厄於火漪園之沒亦多散失惟天一閣
尚存東明喜購舊本與鳳洲家藏書目相較各抄所未見書故
兩浙藏書以天一閣為第一近數十年來吾蕭穀塍王經師家
築十萬卷樓陸氏寓賞樓陳氏湖海樓外此如王中丞南陔汪
吏部蘇潭俱大族皆充棟盈車不假南面百城而抄影善本之
富則以陸氏為第一蓋不惜工貲四方書賈雲集輻湊故插架
初印元明板本俱多至讐校精工分晰真偽王汪諸君皆精于
鄭孔小學尤非炫飾斯文徒誇排比者可擬也

雲英將軍

雲英氏沈豫之族祖姑也系出北莊父鎮乾公明道州守備維

時赤眉肆虐鴟突梟張雲共隨任左右密贊兵務會萬策賈公
任都司中年喪偶來求匹鎮乾公以賈籍四川且齡齒懸絕似
難之懇再三字焉未幾遂成婚方匝月值烽烟四起將軍歷陳
戰守利弊以深溝高壘為上計而賈公以先軫之勇深入敵師
其沒其存絕無音信而鎮乾公亦復罹谷吉之害將軍披鐵衣
突入重圍奪父屍而出忠勇之聲溢于兩湖南北上即命領守
備事錫爵將軍旋念靖邊譙洗辟署究屬夫人佐命平陽虎劍
卻嫌公主遂解職向西遙祭其夫文辭淒惋杜鵑之血點點皆
殷湘竹之痕斑斑是淚慟哭之下即扶父柩回里喪葬後設館
村左將軍素通春秋學吾鄉西河毛鴻博嘗欲從馬融受書之
禮而不可得今集中所載忠貞節孝四德俱全所謂雲英將軍

傳者即此也下簾十餘年忽一日至白洋觀潮回曰吾大命至
矣言訖而逝年三十九嗟乎將軍之行述志乘載之廟宇祀之
廟立湖公卿奏之即綴文傳奇家亦無不奮筆而揚厲傳奇有
南麻溪亦載記焉俞氏三奇編之以視木蘭之從征韋母之隔絳不啻霄壤矣芝龕記

今世屬官送米炭酒物用粟亦有本

曲禮獻粟者用右契孔疏粟梁稻之屬先以右契獻俟其來取
則以左契合之符則與之以梁稻未可即與故以右契先也

古棺木無釘

士喪禮掘肆見衽衽今小要孔疏云其形兩頭廣中央小也古
棺木無釘但先鑿棺邊及兩頭合際處作坎形則以小要連之
今固棺束並相對束字每束之處以一行之衽連之若堅束之

處則豎著其衽以連棺蓋及底之木使與棺頭尾之材相固漢時呼衽為小要也又按喪大記疏云衽謂燕尾合棺縫際也棺兩邊各三衽每當衽上輒以牛皮束之因憶先師陳待軒夫子居講席云余在京時考工車制不見有釘字不知作何聯貫惜不就正於東原戴經師知周秦間器物多以韋皮束之而益嘆先師讀書真有心得也

李罕山先生

先生為越郡巨姓其先世為運同官貲甚裕而先生無富家習篤行有實學少游黔記程詩幾盈篋多本于蕭遜後回里受知於大興石君朱文正公名譽卓卓其時陳傳臚治鋒先生何秋府殿英先生皆結為密友豫執贄于謝氏家塾未兩載而先生

已返道山矣手鈔書不下數百卷成帙者為謝同門攜去豫收拾闕本并未成稿尚有錦囊詩話四卷其體例頗與滄浪詩話貢父詩話相似與尋常專事尋章摘句者迥別真有用書也豫不能付之梓人深自愧已

東京賦

由余以西戎孤臣薛注孤臣謂孤陋之臣按由余本晉人忘入西戎故曰孤臣非孤陋之謂如曰孤陋豈能析服繆公哉卒於金虎善注引漢官儀貪求之德堅若金讒誨之言惡若虎似牽強不如以金虎屬秦接下嬴氏搏翼氣脉聯貫
悚悚黔首悚同慄廣韻思懼貌

西登少華善注謂西園中有少華之山按此不過與蓬壺方丈

之假立其名非少華之真在西園中也
內阜川禽魯語登川禽注川禽鼈蜃之屬
咸池不齊度於鼃咬集韻哇咬淫聲

吾十有五而志於學

鄭君禮記注十五始入小學十八入大學而集註云十五者本
保傳八歲入小學十五入大學之文

搢紳

案搢紳如見於馬遷五帝本紀贊本朝職官備見於此其實所
該者廣如言疆域則四至八到之義詳焉如言郡縣則赤紫畿
輔列焉如言貢賦則粟米錢稅具焉如言道里則驛駟程站列
焉如言物產則珍錯麤細麇焉如言險要則關津梁道設焉其

體本乎官禮之精其用寓諸貢雅之細真會典之權輿統志之
先聲也

公館

曾子問篇曰公館復私館不復自卿大夫士之家曰私館公館
與公所為曰公館注公館公家所造之館今外省候選補者其
宅第皆稱公館殊非古義

為學貴專一

嘉定王鳳階語休寧戴東原曰吾昔畏姬傳今不畏之矣東原
曰何耶鳳階曰彼好多能見人一長輒思並之夫專力則精雜
學則粗故不足畏也東原以見告姚遂改之

宿北錢清

劍南詩有宿北錢清題今日在南岸者謂南錢清在北岸者謂北錢清北屬蕭山南屬山陰然南錢清之名至今尚在而北錢清故老無有識者矣

望溪先生不作詩

望溪方先生嘗以詩就正於查初白先輩曰君於此道不相近夙以古文名世不如併力一途以幾登峰造極方終身不作詩而後果以古文為一代宗工矣

宋元明刻古本記畧

戴氏東元與盧侍講書云大戴禮記刻後印校俗字太多明嘉靖癸巳袁氏依宋本重刻之大戴禮記齊皆作絲後人不識古字遂謫作參而夙字不可通矣又暑而渴宋元本渴並作喝通

解載此文作喝注云喝傷暑也渴喝皆字形之謫

武王踐阼篇於百姓朱文端本作十百世蓋十謫作於轉而為於妄改者不知此解其量十世百世也

次妃陳隆氏別本作陳鋒與記合

本命篇人資始焉袁氏本作人莫違焉資始二字似後人所改入者戴吉士集

公劉篇箋義云考國語史記所錄祭公謀父諫穆王曰昔我先

王俗本國語脫去王字世后稷以服事虞夏戴吉士毛

士冠禮筵未坐醉醴捷柶與唐石經捷作建宋人刻釋文者誤

疑經文作捷柶并注中建字亦改為捷曾不一檢士昏禮文皆

禮作建沿誤數百年賴有石經正之此石經所以可貴予見小字

經注俱是建字

摯正字贅俗字士冠士昏二篇皆用摯字獨士相見篇皆作贅蓋張淳所改張淳儀禮識誤云此卷贅字經注總四十有四皆從手按釋文云贅本又作摯音同其從手者必非陸氏所釋唐石經本作摯宋刊本猶然錢宮詹今改從貝唐石經本作摯宋刊本猶然錢宮詹養新錄

詩王鄭唐風揚之水今本揚皆從手旁臧鏞堂云洪氏隸釋載漢石經唐風第三章揚作揚而太平御覽八百十五八百十六並引唐第二章揚之水皆從木旁知王鄭唐風揚之水本皆作揚自陸德明誤以為非而唐石經又定從揚字今遂無作揚者矣尚書禹貢揚州據郭忠恕佩觿本作揚州宋本爾雅釋地亦作揚州

唐人五經正義本與注別行後儒欲省兩讀并而為一雖便於初學而卷第多失其舊不復見古書真面宋刊爾雅疏單行本不特紙墨精妙且可想見古注疏之式良可寶也

繫辭傳德薄而位尊知小而謀大力小而任重三句中用兩小字似覺偏枯當從唐石經作力少而任重為正三國志王修傳注引魏畧力少任重漢書王莽傳自知德薄位尊力少任大今本少作小惟北宋景祐本是少字

儀禮禮記俱有周弁殷哱夏收之文說文無哱字未審所從曰哱當從月吁聲鈕樹玉云宋本說文及五音韻譜覓字下並作殷日吁明刻五音韻譜亦作吁

序卦傳傷于外者必反於家唐石經及岳氏本並同今本作必反其家周易本義咸淳本亦作於字○錢宮詹潛研堂集

萬歷中北監本刻儀禮士昏禮脫壻授綏姆辭曰未教不足與為禮也一節十四字賴有長安石經注以補此一節而其注疏

遂亡鄉射禮脫士鹿中翻旌以獲七字士虞禮哭止告事畢賓出七字特牲饋食禮舉解者祭卒解拜長者答拜十一字少牢

饋食禮脫以授尸坐取解與七字今按儀禮經傳通解本亦有

脫誤○江氏慎修羣經補義節錄

乘馬班如鄭本作般馬云班班旋不進是馬亦為般也子夏傳

云相牽不進虞仲翔云乘馬班躡皆般旋難進之意是諸家義

皆作般陸德明云班如如字非也

孟子梁惠王下故居者有積倉行者有裹糧也翻刻宋本糧作

囊考正義釋孟子之言云故居者有穀積于倉行者有糧裹於

囊然後可以日方開道路而行則北宋作疏時尚作行者有裹

囊

儀禮鄉飲酒禮執觶興洗北面唐石經作盥洗北面多一盥字

明鍾人傑單注本同據賈疏知本無盥字開成石經承用俗本

明刻鄭注本又多據唐石經參校故皆有盥字鏞堂謹案儀禮

字从疏則宋板有盥張據疏刪之注疏本據賈氏語故盥本毛本皆無盥字是

是刈是獲石經與宋刻單注本爾雅同作是刈是獲獲獲羹之

也上一字从水下一字从金鏞堂謹案宋槧雪窓書院單注刈

从又从刀為正或作艾作义並假借字○臧茂才經義雜記

遂以摯見於卿大夫鄉先生案宋明道本國語韋注引禮既冠

正作卿則章所見儀禮禮記皆作卿不作鄉可知此是正陸氏釋文之誤

周禮幣餘條魯語不腆先君之幣器宋明道如是宋庠改即敝

器也古敝字多通作幣如管子輕重甲篇靡幣之用孔宙碑彫

幣管子小匡戎車待游車之弊皆是

王尚書述聞

二名不徧諱愚按九經三傳沿革例云曲禮二名不徧諱徧合作徧亦引疏不徧諱者云云亦引舊杭本柳文載子厚奉敕二名不徧云此作徧字是舊禮作徧字明矣然仍習既久不敢如蜀大字本與國本輕於改也沿革例之言如此夫岳氏與毛氏所據疏皆宋淳化景德時所刻單行疏文也。

段玉裁經韻樓記

易以辭為重

謝山全氏曰困學紀聞修辭立其誠易以辭為重語意微有病

豫

案

深寧所論乃居則觀其象而玩其辭之辭非辭章辭說之辭全氏摘之太苛

早達鮮著述

冬牕晨起紅日烘頭抽榻上書適得段大令與黃紹武書云前

者戴金谿比部讀四郊小學疏證因問孟子書何以或言庠序學校或但言庠序云云因念予先師戴大司寇今之叔重也頃者已返道山不聞其所著何書所述何集日以案牘文字攪擾紛蹟中祕之冊不暇翻閱少年早達師十四舉於鄉亦不幸事非必聲勢富貴足損性靈品學即于典章掌故亦足以耗精神消智慮者近閱八閩侯官李蘭卿觀察榕園文鈔哀然成集然半多公事文字其自敘云蘭十三舉京兆十六入中書旋臻樞院由上考授粵西思恩太守在科為清華選在郡為循良牧今已擢監司權臬篆矣云云蘭卿讀書亦十行下而竊恨無福於故紙堆中始知窮老著書披尋魚蠹亦樂事也

仿今言一卷終



國家圖書館, NATIONAL CENTRAL LIBRARY, TAIWAN, R.O.C.

山陰門人陳鴻校

